

28 JUL 1997

PESERTA LID '97 CUBA LAKSANAKAN PERKONGSIAN BIJAK

Oleh: Michael Raj

LANGKAWI, 28 Julai (Bernama) -- Dialog Antarabangsa Langkawi 1997 (LID '97) kali ketiga bermula hari ini dengan kira-kira 350 peserta sedang berusaha untuk melaksanakan konsep perkongsian bijak.

Pengerusi bersama Jawatankuasa Penasihat Antarabangsa untuk LID, Tan Sri Tajudin Ramli, berkata LID seharusnya berusaha untuk mengurangkan ketidakseimbangan di kalangan negara Komanwel, dengan itu mewujudkan satu keadaan di mana "kemakmuran sebenar-benarnya sepunya dan sekongsi."

"Perkongsian bijak melepasi sempadan...ia mesti memberi faedah kepada setiap lapisan masyarakat seperti yang dicapai oleh Malaysia Diperbadankan," katanya pada satu perhimpunan terdiri daripada beberapa orang presiden dan perdana menteri dari wilayah selatan Afrika serta tokoh penting korporat dari seluruh dunia.

Mereka termasuk Presiden Robert Mugabe dari Zimbabwe, Presiden Botswana Sir Ketumile Masire, Presiden Namibia Dr. Sam Nujoma, Naib Presiden Uganda Profesor John Evans Atta Mills, dan Naib Presiden Malawi Justin Malewezi.

Perdana Menteri Datuk Seri Dr. Mahathir Mohamad, penaung dan penasihat LID '97, yang mengilhamkan dialog perintis pada 1995, akan menyampaikan ucapan utama pada majlis jamuan di sini malam ini.

Bagaimanapun, seorang lagi pengerusi bersama Jawatankuasa Penasihat Antarabangsa LID, Dr Kenneth W. Gray, mengingatkan para peserta yang kebanyakannya berpakaian biasa, bahawa LID "bukanlah satu majlis jamuan."

"Ia adalah satu forum perbincangan yang serius. Ia bukan satu monolog, tetapi satu dialog di mana anda boleh mempelajari daripada orang lain, tetapi akhirnya, anda akan berpuas hati dan berasa gembira."

Dr. Gray tidak ketinggalan untuk memberi penghargaan kepada Dr. Mahathir, sambil menyatakan bahawa "tanpa wawasannya dan cabaran untuk kita melaksanakan perkongsian bijak, kita tidak akan berada di sini hari ini."

"Adalah diharapkan, kita semua akan menjadi pemenang dalam upacara ini," katanya sambil menambah bahawa pertumbuhan akan merebak dan sebaik sahaja anda memperolehnya, pastikan yang ia tidak terlepas. Ia adalah berkaitan dengan menjanakan satu lajukan dan permulaan lajukan biasanya dari kecil.

"Sebenarnya pada hari ini. Ia adalah salah satu daripada permulaan tersebut, membuka jalan kepada perkongsian untuk beberapa tahun...ia adalah berkaitan dengan mengimbangkan kelemahan anda dengan kekuatan pihak lain," katanya.

Setiausaha bersama LID '97, Tan Sri Dr. Omar Abdul Rahman, yang juga penasihat sains kepada Perdana Menteri, berkata dialog tahun ini akan memberi tumpuan kepada perhubungan antara syarikat, teknologi, perkongsian besar-besaran membabitkan kerajaan dan syarikat pada peringkat serantau dan sejagat, dan teknologi dalam industri perkhidmatan kewangan. -- BERNAMA

MR SIA